

04/09/1997

Pertemuan PM, mufti jernihkan keadaan

Ali Mamat

RAKYAT Malaysia seharusnya menarik nafas lega dan menyambut baik hasil pertemuan lebih dua jam antara Perdana Menteri Datuk Seri Dr Mahathir Mohamad dengan 14 mufti di Jabatan Perdana Menteri, semalam.

Kewarasan ternyata mengatasi sentimen dan emosi apabila pada akhir pertemuan itu, mufti berkenaan bersetuju tidak akan mengeluarkan sebarang fatwa pada masa depan tanpa terlebih dulu merujukkannya kepada Jawatankuasa Majlis Fatwa Kebangsaan (JMFK).

Mereka juga bersetuju menyelaraskan prosedur pentadbiran hukum syarak dengan mengambil kira kepentingan pelaksanaan hukum itu yang sama di semua negeri.

Pertemuan itu diadakan bagi menjernihkan kekeruhan yang timbul selepas Jabatan Agama Islam Selangor (Jais) menangkap tiga wanita Islam yang menyertai satu pertandingan ratu cantik baru-baru ini. Tindakan itu dikatakan sejajar dengan fatwa mufti negeri yang mengharamkan orang Islam menyertai pertandingan seumpama itu.

Mufti yang hadir itu ialah sembilan dari negeri beraja dan lima lagi yang dilantik oleh Yang di-Pertuan Agong.

Menurut pemerhati, soal penyeragaman fatwa dan pentadbiran hukum syarak di negara ini sepatutnya telah lama diselesaikan kerana dalam banyak hal, perbezaan kaedah dan pendekatan antara satu negeri dengan satu negeri yang lain lebih banyak menimbulkan kekeliruan daripada penyatuan fahaman sesama umat Islam.

Walaupun hampir 100 peratus daripada umat Islam di Malaysia menganuti fahaman Ahli Sunnah wal Jumaah, corak pentadbiran syarak masih berbeza di antara satu negeri dengan negeri yang lain.

Ada sesetengah fatwa yang dikeluarkan oleh mufti di sebuah negeri tidak pula turut dikeluarkan oleh mufti di negeri lain, seperti yang berlaku di Sarawak baru-baru ini apabila pihak berkuasa agama Islam negerinya mengharamkan lelaki Islam daripada menyertai pertandingan bina badan.

Perbezaan ketara pentadbiran hukum syarak antara negeri juga dapat dilihat daripada kadar denda atau hukuman yang dikenakan bagi kesalahan jenayah. Tidak semua negeri memperuntukkan hukuman bagi kesalahan zina, manakala Kedah dendanya tidak lebih RM5,000 atau penjara tidak lebih dua tahun atau kedua-duanya sekali.

Jika perbezaan itu dibiarkan, orang pasti akan bertanya di mana letaknya penyatuan syariat dan keunggulan Islam sebagai sebuah agama yang universal, sedangkan undang-undang Islam itu berasal dari sumber yang satu iaitu Quran dan Sunnah Rasulullah?

Soal keikhlasan Dr Mahathir untuk melihat penyeragaman undang-undang Islam tidak harus dipertikai. Beliau tidak pernah mempersoalkan tentang hukum. Yang haram tetap haram baginya.

Apa yang lebih penting, rakyat harus melihat hasil pertemuan itu secara positif.

"Ketika kita tidak menolak hakikat bahawa mufti sememangnya pakar dalam agama, mereka selaku tonggaknya harus membuka minda masing-masing agar dapat sama menimba pengetahuan berhubung ilmu yang di luar bidang pengajian mereka," kata seorang penganalisis.

Oleh kerana Islam itu sendiri satu "ad-din" atau cara hidup yang sentiasa sesuai dengan peredaran zaman, masanya sudah tiba bagi pemimpin agama di negara ini membiasakan diri dengan perkembangan sains dan teknologi. - Bernama

(END)